

Gálatas

Pablo Galacia majarãre Jesu yarãre gojabeopu

¹⁻² Yũhu Pablo mũa Galacia majarãre ipũre gojabeogu iiaa. Yũhu Goãmu yare buhedore Jesucristo ãgu apidi ãhraa. Masa ne yũre buhedore apibirima. Jesucristopu ãgu Pagu Goãmu mera yũre apimi. Goãmu ãhrimi Jesucristo sãridire masudigu. Eropigu yũhu yu mera majarã mera Jesucristo yarã mera mũare õadoreaa.

³ Goãmu mari Pagu mari Opu Jesucristo mera mũare õadoreaa. ãgu mũare itamuri mera õaro árĩque mũa.

⁴ Jesucristo, ãgu Pagu Goãmu gamediro dopa ta iigu, ãgu basi mari ñeri iira dipuwaja sãribasadigu árĩmi. Eropiidi árĩmi i mũm majarã ñero árĩricũre mari iibiriboro dopa.

⁵ ãgu eropiicũ ãha mari Goãmure “Mũhu õagu õaro iiaa,” mũuri nũcu arĩro gahmeaa. Eropa ta iirã.

Jesucristo masare ãgu tauburi yujuñe ta buheriñe ãhraa, arĩ werepu Pablo

⁶ Mũa mata Goãmu yare duhurã iica. Goãmu mũare ãgu yarã árĩmorãre aĩdigu árĩmi Jesucristo ãgu marire sãribasara mera. ãgu mũare eropa aĩquerẽcũ mũapũ ãgure duhu gajirã ya buherire peenũgarã iica. “Gaji ãhraa marire tauburi buheri,” erã arĩ werecũ peerã iica mũa gajirãre. Mũa eropiira querere peegu pee uca wahaa yũhu.

7 Õpa waro iica mũa árĩrore. Gajirã mũa pohro eja mũare were goroweorã iicoma. “Jesu-cristo marire taumi,” arĩ buherire gohrotodiarã, “Gaji ãhraa marire tauburi buheri,” arĩ buherã iicoma mũare. Eropigũ mũare ire werediaca. Gaji buheri marire tauburi buheri marica.

8 “Gaji buheri ãhraa mari tauburi buheri,” mũare arĩ were goroweorãre Goãmũ buriigã dipuwaja moagũ peamegue wadoreporo. Yũ basi ta were goroweocũre Goãmũ yũ sãre dipuwaja moaporo. Anyu umaro majagũ ãgũ eropa buhecũ ãgũ sãre dipuwaja moaporo.

9 Gũa gajisubu arĩrare dipaturi yũhũ werea daja mũare. Yujugũ mũare ðari buherire gajiropa buhecũ, gũa mũare buhediro dopa werebigure ãgure Goãmũ buriigã dipuwaja moaporo. Peamegue wadoreporo.

10 Yũhũ masare buhegũ Goãmũ gamero dopa ta diaye majare buhea. Masa peesuacũ, peesuabiricũ sãre buhea. Eropigũ dohpaguere yũhũ masa peediari dihtare wereniguibeaa. Cristo gamero dopa ta buhediacã. ãgũ pohro majagũ ðagũ árĩdiagũ eropa buhea yũhũ.

Pablo ãgũ Jesucristo yare buhebure apirare werepũ

11 Õpa weregura mũare: Yũhũ mũare ðari buheri eropa arĩ buhera masa ya pepiri árĩbeaa.

12 Ne yujugũ masũ iri buherire yare weredorebirimi. Ne yujugũ masũ yare buhebirimi iri buherire. Jesucristo ãgũ basi yare irire masicũ iimi.

13 Iribojegue yu árīricurare yuhu judio masa buherire peenurarasubu yu iirare mua peetuhabu. Yuhu Jesucristo yarāre burigā ĩhaturigū nurusiamuribu erāre ñero iibu. Eropigu Jesu yarāre burigā ñero iigu erāre wejēpehocā-diaribu.

14 Eropigu gua judio masa ya buherire yu mera masanirā tauro umupeomuricaribu. Gua ñecu samarā árīricurare burigā iimuricaribu.

15 Yu eropa iirisubu opa wabu yure. Goāmu ĩgu oaro mahiri mera yure sihumi pare. ĩgu yu dehyoaboro coregue beyetuhapu yure.

16 Eropigu ĩgu magure Jesucristore yure masicū iimi. ĩgure masicū iigu yure judio masa árībirāre buhebure apimi. “Jesucristo marire taumi,” arī buherire werebure apimi yure. Eropa Goāmu yure masicū iira pūhrū gajirāre serēpigū wabiribu.

17 Jerusaléngue árīrāre yu core Jesu ĩgu apinirā sāre serēpigū wabiribu. Erere eropa wabigu Arabia yebaguepūre diaye wabu. Pūhrūguere Damascogue dujaa wabu.

18 Ũhre bojori pūhrū Jerusaléngue wabu. Pedrore ĩagu wabu. Pe semana ta árību ĩgu mera.

19 Gajirā Jesu ĩgu apinirāre ne ĩabiribu irisubure. Mari Opa Jesucristo pagu magu Santiago dihtare ĩabu.

20 Yuhu muare eropa arīgu diaye weregu iiaa. Yu opa arīrire Goāmu masimi. Eropa arīgu opa arīdiaca muare. Jesucristo dihta yure masicū iimi ĩgu buherire.

21 Jerusaléngue arīra pūhrū Siria yebague Cilicia yebague ejabu.

²² Irisubu Judea yeba majarã Jesucristo yarãpũ yũre ìha masibirima dohpa.

²³ Yũhũ Jesucristo yagũ árĩri querere peenirã árĩma. “Ìgũ Pablo marire Jesu yarãre ñero iidianũrũ curidigũ dohpaguere Jesucristo yare buhegũ ãhrimi. Mari Jesucristore umupe-orire dedeodiadigũ dohpaguere irire Jesucristore umupeoburire buhegũ wahami,” gajirã erãre eropa arĩ werecũ peenirã árĩma Judea yeba majarã.

²⁴ Eropa peerã Goãmũ mera mucubiriñorã.

2

Gajirã Jesucristo ìgũ apinirã gameñorã Pablo buherire

¹ Catorce bojori pũhrũ Jerusaléngue wabũ daja. Bernabé wami yũ mera. Tito sãre aĩgãbũ. Goãmũ yũre wadoremĩ Jerusaléngue. Eropigũ erogue wabũ.

² Eropigũ erore eja Jesure umupeorã gamenererogue yũhũ erã oparãre boje sihuu werebũ erãre. Judio masa árĩbirãre Jesucristo marire tauburi buherire yũ buherare werebũ oparãre. Eropa weregũ erã yũ buherire òaro masicũ erãre “Õapũrica,” arĩcũ iidibũ erãre. Erã yũ buherire gamebirã yũ buheri sãre “Waja mariri ãhraa,” arĩbocoma, arĩ pepirabũ yũhũ. Erã gamema.

³ Eropirã erã Titore ìgũ judio masũ árĩbiriqweregũ ìgũ Jesure umupeogũ arĩcũ ìha erã judio masa dorero dopa iidorebirima ìgũre.

Eropirã ĩgũre gasiro merogã wiri aĩdorebirima ĩgũre.

⁴ Gajirãpũ Jesure umupeorã gamenererogue ñajajanirãpũ ĩgũre circuncisi3n gasiro merogã wiri aĩcũ gamerima. Erã Jesure umupeorã gohra árĩbirima. Erã gũa sihubiriquerecũ gũa pohrogue peedurirã ñajajanirã árĩma. Gũare weresãdiana. “Erã Jesu yarã Moise dorerire iibirã áhřima,” arĩdiana gũare. “Goãmũ pohro wadiarã gũa dorerire iiro gahmea marire,” arĩ dorediarima daja. Gũa Jesucristo yarãpũre Jesucristo tautuhajami gũa Goãmũ mera 3aro árĩborore.

⁵ Eropirã erã eropa gũare dorecũ ĩarã erãre ne yũhřiribũ. Erãre yũhřirã iri Jesucristo marire tauburi buherire queoro buhemasibiriboaya mũare. Eropirã erã dorediarire cãhmotacãbũ.

⁶ Eropirã Jesu yarã oparã yũ buherire erãre weretuhajara pũhřũ “Mũ buheri 3haa,” arĩrã, yũ buherire yũre gohrotodiabirima. Gũa judio masa dorerire iiburi sãre buhedorebirima. Erere erã oparãre masa umupeoquerecũ erã iiro dopa iibiribũ. Goãmũ árĩpehřerãre oparã árĩrã sãre bu árĩrã sãre yujuropa ta ĩhami. “Erãre beyediro dopa ta yũ sãre Goãmũ beyemi,” arĩ pepibũ.

⁷ Eropirã oparã yũ buherire gohrotodiabirã judio masare árĩbirãre yũ buhe curirare peema. Eropirã yũhũ Jesucristo ĩgũ yare buhebure apidigũ árĩcũ ĩha masima yũre. Eropirã 3pa arĩma yũre: “ĩgũ Goãmũ judio masare iri 3ari buherire buhebure ĩgũ Pedrore apidiro dopa ta mũ sãre apiñumi. Judio masa árĩbirãpũre iri

buherire buhebure mure apiñumi,” arĩma yure.

⁸ Eropigũ ĩgũ Goãmũ Pedrore judio masare buhebure obeodigũ ta yũ sãre obeomi judio masa árĩbirãre buhebure.

⁹ Eropirã erã oparã ƣrerã Santiago, Pedro, Ñu mera yure ĩha masima. Goãmũ ĩgũ mahiri mera ĩgũ yure beyedigũ yũ árĩcũ masima. Eropirã yure Bernabé sãre õaro bocatĩrima. “Eropa ta iirã mari. Mari yujuro mera buherã. Mũapũ judio masa árĩbirã pohrogue buherã warãca. Gũapũ judio masare buherã warãca,” arĩma yure Bernabé sãre.

¹⁰ “Iri dihta iiro gahmea,” arĩma gũare. “Mojomorocũrãre itamuniguicãro gahmea,” arĩma. “Eropa ta iiaa,” arĩbũ gũa erãre. Eropigũ eropa ta yũ buhe curirogue Jesu yarã mera niyerure gameneo erã mojomorocũrãre ohaa dohpa.

Antioquíague Pablo Pedrore werepũ ĩgũ õaro iibirare

¹¹ Ero pũhrũ gũa Antioquía macague árĩcũ Pedro curigũ erami gũa árĩrore Jesure umupeorã gamenererogue. Erogue erara pũhrũ Pedro queoro iibiricũ ĩha ĩgũ eropa iira dipuwaja bũrigã werebũ ĩgũre Jesure umupeorã peeuro.

¹² Eropigũ Pedro Antioquíague ne eragũ gamenere bamurimi judio masa árĩbirã Jesure umupeorã mera. Irisubu gajirã judio masa Santiago obeonirã erama. Erã eranirã õpa arĩ pepirã arĩma. “Árĩpehrerã Jesure umupeorã judio masa árĩbirã sã gũa dorerire iiro gahmea Goãmũ erãre õaro ĩaborore. Eropirã árĩpehrerã judio masa iiro dopa gasiro merogã wiri aĩro gahmea.

Eropa árĩbirã mera babiricãro gahmea,” arĩrã árĩma eranirãpũ. Eropigũ Pedro erã eracũ ĩha judio masa árĩbirãre dũca wami. Erã gasiro merogã wirisũbirinirã árĩcũ erãre dũca wami erã eranirã weresãrire gũigũ. Erã mera babirimi pare.

¹³ Ĩgũ eropiicũ ĩha ero majarã gajirã judio masa erã sã dũca wama judio masa árĩbirãre. Bernabé sã erã iiri queoro árĩbiricũ masiqueregũ erãre ĩhacũ ĩgũ sã dũca wami erãre.

¹⁴ Erã eropiicũ ĩha gamebirigohracãbũ yũhũ. Erã judio masa árĩbirãre dũca warã “Jesu dihta marire taumi,” arĩ ĩhmubirima. “Moise doreri sãre umupeoro gahmea,” arĩ ĩhmurima erã judio masa árĩbirãre. Eropigũ yũhũ árĩpehrerã Jesure umupeorã peeuro burigã arĩbũ Pedroro. “Mũhũ judio masũ árĩqueregũ õguere ne eragũ judio masa árĩbirã mera yujuro mera bagũ gũa judio masa árĩricũrire guñabirabũ. ¿Duhpigũ mũhũ dohpaguere gohrotodiari? ¿Eropigũ duhpigũ dohpaguere erã judio masa árĩbirãpure gũa árĩricũrire iidorediari?” arĩ werebũ ĩgũre ĩgũ queoro iibirira waja.

Árĩpehrerã Jesure umupeocũ Goãmũ taumi erãre, arĩ werepũ Pablo

¹⁵ Gũa judio masa porã ãhraa. Eropa arĩrã gajirã Moise dorerire tarinũgarã iiro dopa árĩbeaa.

¹⁶ Eropa árĩbiriqererã gũa Jesure umupeorã dohpaguere õpa masirã ãhraa. Yujugũ Moise dorerire iicũ Goãmũ pohro waburi árĩbeaa. Ĩgũ Jesucristore umupeonijagũ ĩgũ ñeri iira

dipuwajare cãdijisũdigu wahami. Iri mera dihta õhami Goãmũ mera. Eropirã gua judio masa árĩquererã Goãmũ mera õaro árĩmorã Jesucristore umupeobũ. Goãmũ mera õaro árĩmorã Moise dorerire iibiribũ. Īgu mera õaro árĩmorã gua dorerire umupeorã Goãmũ mera õaro árĩbiriboaya. Eropirã Jesucristore umupeobũ gua ñeri iira dipuwaja pehrebro dopa.

¹⁷ Eropirã gua Jesucristore umupeori mera gua Goãmũ mera õaro árĩrãca. Eropa Jesucristore umupeorã Moise dorerire iibiriquererã Goãmũ dorerire tarinugarã iibeaa. Jesucristo sã Goãmũ dorerire tarinugadoregu ne árĩbeami.

¹⁸ Eropigu masare õpa arĩ buhea yũhũ. Goãmũ mũare “Õarã àhrima,” ĩgu arĩ ĩaboro dopa Jesucristopare umupeoro gahmea. Eropigu “Mũa Goãmũ mera õaro árĩdiarã Moise doreri sãre umupeoro gahmea,” arĩbeaa. Yũhũ Moise dorerire doregu Goãmũ dorerire tarinugagu arĩboya.

¹⁹ Ero corere Moise dorerire iimuriribũ Goãmũ mera õaro árĩdiagũ. Eropa iiqueregu dipuwajacũgu arĩmuriribũ. Dohpaguere Jesucristo mera dipuwajacũbeaa. Eropigu “Iri Moise dorerire iiro gahmea,” arĩbeaa pare. Eropigu yũhũ Goãmũ ĩgu dorero dopa ta ĩigu iiaa.

²⁰ Jesucristo crusague sĩrigu yũ ñegu árĩrare gohrotodigu arĩmi. Eropigu yũ ero coregue arĩdiro dopa arĩbeaa pare. Cristo yũ mera árĩgu yũre ĩgu dorerire õaro iimasicũ iimi. Eropigu yũ arĩricũrare iibeaa. Jesucristo yapũre iiaa. Īgu Jesucristo yũre mahitarigu yũre yũ ñero

iira dipuwaja s̄iribasadi árĩmi. Eropigu ĩgure guñaturagũ ĩgu dorerire iiaa.

²¹ Goãmũ mera õaro árĩmorã mari ñecũ samarã árĩricurire, Moise dorerire iicũ Jesucristo mari ñero iira dipuwaja s̄iribasara wajamariboya. Eropigu ne umupeogu duhusome “Jesucristo marire taumi,” arĩ buherire.

3

Jesucristore umupeori mera Goãmũ marire “Õarã ãhrama,” arĩ ĩhami, arĩ werepũ Pablo

¹ Mũa pee masibirã ãhraa dohpaguere. Mũare Jesucristo ĩgu basi mari ñeri iira dipuwajare s̄iribasare mũare werecũ mũa õaro ĩha masiribũ. ¿Mũa eropa õaro masicũ noa mũare goroweoari dohpaguere iri diaye maja mũa umupeoborañere?

² Eropigu õpa serẽpidiaca mũare. ¿Mũa Moise dorerire umupeori mera Espĩritu Santo mũare eranũgari? Erabirimi. Mũa “Jesucristo marire taumi,” arĩ buherire peecũ Jesucristore umupeocũ ĩgu Espĩritu Santo mũare erami. ĩgu yarã mũa árĩmorã árĩcũ erami.

³ ¿Mũa duhpirã pee masibirã iiro dopa wahari dohpaguere? Mũa ne Jesucristore umupeorã Espĩritu Santo itamuri mera ĩgu yare iimũribũ. ¿Eropirã duhpirã dohpaguere mũa turari mera iiditari?

⁴ ¿Mũa Jesucristo yarã árĩnũgarã mũa Jesucristore umupeora waja mũa ñero tarirare guñabeari? ¿Mũa eropa umupeora “Bu gohra ãhraa,” arĩ pepiri mũa dohpaguere?

⁵ Ōpa ðaro guñaro gahmea. Goãmũ mũare ãgu Espírítu Santore odĩgu árĩmi. Espírítu Santo mũa mera árĩgu mũa watope deyoro moarire mũare ðarire iimi. Ĩgu eropiũgu Moise dorerire mũa umupeori mera eropa iibeami. Mũa “Jesu-cristo marĩre taumi,” arĩ buherire ðaro pee ĩgũre umupeocũ eropa iimi.

⁶ Gũa judio masa ñecũ Abrahãpu Goãmũre “Diaye ta árĩgu ãhrimi,” arĩ ðaro umupeoñumi. Ĩgu eropa umupeocũ ĩha Goãmũ ĩgũre “Ñeri dipuwaja marĩgu ðagu ãhrimi,” arĩ ĩañumi.

⁷ Eropirã ðpa masique mũa. Goãmũ ðpa arĩmi: “Árĩpehrerã masa judio masa árĩbirã sã Abrahã umupeodiro dopa ta yũre umupeorã Abrahã pãramerã ãhrima. Eropirã yaharã ãhrima,” arĩmi Goãmũ.

⁸ Iribojegue irire Goãmũ arĩ wereyutuhanũmi. Ĩgu werepira ðpa ãhraa ĩgu yare gojarapũgue: “Árĩpehrerã masa judio masa árĩbirã sã yũre umupeorãre ‘Ōarã ãhrima,’ arĩ ĩagũca. Ñero iira dipuwaja marirã ĩagũca erãre,” arĩñumi. Eropĩgu iri ðari buherire Abrahãre arĩ wereyuñumi. “Árĩpehrerã masa mũhũ yũre umupeoro dopa ta yũre umupeocũ ‘Ōarã ãhrima,’ arĩ ĩagũca yũhũ erãre. Erãre ðaro ĩgũca,” arĩñumi Goãmũ Abrahãre.

⁹ Abrahã Goãmũre ĩgu umupeocũ Goãmũ ðaro iĩñumi ĩgũre. Eropĩgu árĩpehrerã masa mari sã ĩgũre umupeocũ Goãmũ ðaro ĩgũcumĩ mari sãre.

¹⁰ Gajirã ðpa arĩrã ãhrima. “Moise dorerire ðaro iicũ Goãmũ ‘Ōarã ãhrima,’ arĩ ĩagũcumĩ

marire,” arĩrima. Eropa arĩrã dipuwajacurã ãhrima dohpa. Goãmũ yare gojarapũgue õpa arĩ werea. “Moise dorerire iirã erã iri dorerire árĩpehrerire queoro iipehobirã dipuwajacurã ãhrima,” arĩ gojara ãhraa. Eropirã iri dorerire ipehomasibirira waja dipuwaja moasũmorã ãhrima árĩpehrerã.

¹¹ Ne yujugũre iri dorerire ipeho masiya mara. Eropirã Moise dorerire iiri mera Goãmũ mera õamasibeama. Õpa arĩ gojañuma Goãmũ yare gojarapũgue. “Ĩgũre umupeorãre Goãmũ ‘Õarã ãhrima,’ arĩ ĩhami. Ñero iira dipuwaja marirã ĩhami. Eropirã erã õaro árĩniguicãrãcoma Goãmũ mera,” arĩ gojañuma. Eropirã mari masia. Ne yujugũre iri dorerire ĩgũ iiri mera Goãmũ ĩgũre “Õagũ ãhrimi,” arĩ ĩabeami. Goãmũre umupeogũ dihta õaro árĩgũcumĩ ĩgũ mera.

¹² Goãmũre umupeogũpũ, “Goãmũ yare yũ ñero iira dipuwaja maricũ iigũcumĩ,” arĩmi. Moise dorerire iigũpũ “Yũ basi iri dorerire iigũ ñero iira dipuwaja mariro õaro árĩgũca,” arĩrimi. Eropigũ ĩgũ iri dorerire ipehomasibigũ árĩgũ ñero iira dipuwajacũgũ dujami.

¹³ Eropirã mari árĩpehrerã iri doreri mera ñero iira dipuwajacurã dujamũriribũ. Mari eropa árĩcũ ĩha, Jesucristo mari ñero iira dipuwaja ĩgũ basi wajayemi ĩgũ crusague sĩrigũ. Goãmũ yare gojarapũgue õpa werea: “Ĩgũ yucũgũgue dirisiudigũ Goãmũ ĩgũ ñero iira dipuwaja moadigũ ãhrimi,” arĩ gojañuma iri-bojegue. Eropigũ Jesucristore crusague dirisi-udigũre mari ñero iira dipuwajapũre Goãmũ

ĩgũre dipuwaja moadigũ árĩmi. Eropirã maripũ ñero iira dipuwaja marirã dujaa pare.

¹⁴ Jesucristo eropiicũ Goãmu Abrahãre õaro ñadiro dopa ta judio masa árĩbirã sãre õaro ñanugami. Eropigũ ĩgu arĩdiro dopa ta ĩgu obeodigũ Espĩritu Santopũ erami marĩre Jesucristore umueorãre.

Ĩgu buherare werenemopũ Pablo

¹⁵ Mari masa mari iiro dopa ta weremũhtagura mũare. Perã “Õpa iirãca,” erã arĩ weretamura pũhrũ gajigũ gohrotomasibeami.

¹⁶ Eropigũ Goãmu Abrahã mera weretamura pũhrũ Abrahãre ĩgu arĩrare gohroto masiya mara. Õpa arĩ werepiñumi ĩgũre: “Mũ pãrami árĩturiagũ mera árĩpehrerã masare õaro iigũra,” arĩ wereñumi. Eropa arĩgũ ĩgu pãramerã árĩturiarãgue mera arĩgũ iibiriñumi. Yujugũ ta ĩgu pãrami árĩturiagũ dihtare arĩgũ iĩñumi. Eropa arĩgũ ĩgu pãrami árĩturiagũ Jesucristo ariburire arĩ wereyugũ iĩñumi.

¹⁷ Eropigũ õpa arĩ werea mũare: Iribojegue Goãmu Abrahã mera weretamugũ masare ĩgu õaro iiburire wereñumi. ĩgu eropa weretamura pũhrũ yoari boje pũhrũ cuatrocientos treinta bojori árĩturiagũ mera árĩpehrerã masare õaro iigũra,” arĩ wereñumi. Eropa arĩgũ ĩgu pãramerã árĩturiarãgue mera arĩgũ iibiriñumi. Yujugi pũhrũ Moiserẽ ĩgu doreri apiñumi. Moise doreri árĩnũgaquerecũ Goãmu Abrahãre werepira pehrecũ iibiriyoro.

18 Goãmũ Abrahãre mahigu õpa ãgure arĩ weretuhãnumi. “Árĩpehrerã masare mũ yũre umupeoro dopa ta yũre umupeorãre õaro iigũca,” arĩ weretuhãnumi. Eropiro Moise doreri árĩnũgaquerecũ Goãmũpũ iri dorerire iiri mera masare taubeami. Moise doreri iiri mera mari taricũ Goãmũ mũare “Waja mariro õaro iig mera arĩgu iibiriñumi. Yujugũca,” ãgu arĩrapũ duhpiburi árĩbiriboaya.

19 ¿Eropigu duhpiburire iri dorerire Moisere apiyuri Goãmũ? Masa erã ñerire masiborore apiñumi iri dorerire erã ñero iira dipuwaja masiborore. Abrahã pãrami árĩturiagu Jesucristo ãgu eracũgue árĩtuya iri doreri. Eropigu Jesucristo ãgu eracũ Goãmũ Abrahãre ãgu werediro dopa ta masare õaro iĩnumi. Goãmũ iri dorerire apigu anyuare weremũhtãnumi. Erã anyua wereñuma Moisere. ãgu Moisepũ masare wereñumi.

20 ãgu masare õaro iiburire Goãmũ ãgu basi ta werepiñumi Abrahãre. Gajirã mera werebeobiriñumi ãgu iri dorerire apidiro dopa ta. Eropigu ãgu Abrahãre werepirapũ Moise doreri tauro õhaa.

Moise dorerire werepũ Pablo

21 Goãmũ Moisere ãgu dorerire apigu, ero coregue Abrahãre ãgu arĩrare “Yũ arĩdiro dopa iisome pare yũhũ,” arĩgu iibiripũ ãgu. Abrahãre ãgu arĩmũhtadiro dopa iibu iipũ. “Masare õaro iigũca,” ãgu arĩrare iibu iipũ dohpa. Moise dorerire iiri mera mari Goãmũ mera õaro árĩmasirã mari iri dorerire õaro iirã ñero iira dipuwaja opabiriboya.

²² Eropa árĩquerecũ Goãmũ yare gojarapũgue õpa ãhraa: “Masa árĩpehrerã erã ñero iira dipuwaja opama, arĩ gojara ãhraa. Eropa dipuwajacũrãre erã Jesucristore umupeocũ Goãmũ õaro iigũcumi erãre. Ĩgũ Abrahãre werediro dopa ta iigũ erãre ñero iira dipuwaja marirã ĩagũcumi.

²³ Jesucristore umupeori mera masare tauburi árĩboro core gũa Moise doreri doca árĩmũribũ. Eropa Moise dorerire iirã peresugue árĩro dopa árĩmũribũ. Jesucristo gũare tauboro core eropa árĩmũribũ.

²⁴ Õpa sã árĩburi árĩbũ Moise doreri: Moise doreri mera Jesucristore mari masiburi erabũ. Mari porãre erã buherogue soro dopa ta Moise doreri marire Jesucristore masicũ iibũ. Eropirã mari Jesucristore umupeocũ ĩgũ marire taumi. Mari ñero iira dipuwaja maricũ iimi.

²⁵ Eropirã dohpaguere mari Jesucristore umupeorãre Goãmũ “Õarã ãhrima,” arĩ ĩhami. Gũa Jesucristore masirã ĩgũre umupeorã árĩrã dohpaguere Moise doreri doca árĩbeaa pare.

²⁶ Mũa sã árĩpehrerã Jesucristore umupeorã ĩgũ yarã árĩrã Goãmũ porã ãhraa.

²⁷ Eropirã mũa árĩpehrerã Jesucristore umupeorã ĩgũ waĩ mera waĩyesũnirã árĩrã Jesucristo ĩgũ iro dopa ta ãhraa. Jesucristo Goãmũ magũ árĩro dopa ta mũa sã Goãmũ porã ãhraa.

²⁸ Eropirã árĩpehrerã Jesucristo yarã yujuro mera ãhraa. Yujugũ porã iro dopa ãhraa. Eropigũ gũa judio masare mũa judio masa árĩbirã sãre Goãmũ yujuro pa ta ĩhami. Masa

pohro majarãre erã oparã sãre yujuropa ta ìhami. Ùmare nome sãre yujuropa ta ìhami.

²⁹ Eropirã mua Jesucristo yarã árĩrã Abrahã pãramerã sã àhraa. Eropigu Goãmu Abrahãre “Mũre òaro iigũra,” arĩrare mua sãre iimi. Cristo yarã mua árĩcũ ìagu mũare òaro iigucumi.

4

¹ Mari iri doreri doca árĩbiriborore mari Jesu yarã árĩborore weregũra daja. Yujugu majigu ìgu pagu yare wũaro opapehobu árĩqueregu majigu árĩgu pohro majagu iro dopa àhrimi. Gajirã dorero doca àhrimi dohpa.

² Gajirã ìgu pagu apinirã ìgu ya árĩburire ìhadibuma dohpa. ìgu pagu gameranũ árĩcũgue ìgu basi ìgu yare doremi pare.

³ ìgu majigu gajirã dorero doca ìgu árĩro dopa ta mari masa mari ñecũ sũmarã árĩricũri doreri doca árĩmũriribũ. Pohro majarã iro dopa ta árĩmũriribũ.

⁴ Mari eropa árĩnirãre mari Pagu Goãmu ìgu gameranũ ejacũ ìgu magure ìgu pohro árĩdigure obeodigu árĩmi. Ìgure obeocũ ìgu nomeoguere dehyoadigu árĩmi. Eropa dehyoagu judio masu árĩdigu árĩmi Moise dorerire iigu. Eropigu Goãmu obeodigu árĩmi ìgu magure.

⁵ Gũa iri doreri doca árĩrãre taubure obeodigu árĩmi ìgu magure. Ìgu marire taugu mari pohro majarã iro dopa árĩnirãre wiugu ìgu porã árĩcũ iimi.

⁶ Eropiituhaja mua sã ìgu porã árĩcũ ìgu Jesucristo mera Espĩritu Santore obeomi mũare.

Eropirã Espíritu Santo marire ïgu itamuri mera Goãmure mari Pagure “Ahũ,” arãa mari pare.

⁷ Eropirã mua Goãmũ porã ta ãhraa. ïgu porã árĩrã mua ñecũ sũmarã doreri doca, pohro majarã iro dopa árĩbeaa pare. Goãmũ magũ Jesucristo wiunirã ãhraa. Mua eropárĩrã ïgu porã árĩrã Goãmũ oburire oparãca mua árĩpehrerire.

Pablo Galacia majarã Jesu yarãre guñaricũpũ

⁸ Mua ero core Goãmure masibirã árĩrã gajirã goãmarãre umupeomũriribũ. Eropirã erã pohro majarã iro dopa árĩmũrirabũ. Goãmũ gohrare umupeobirimũribũ.

⁹ Eropa árĩquererã ta dohpaguere Goãmure masia. Goãmũpũ muare ïha masimi. ¿Ïgu eropa masiquerẽcũ ta duhpirã i yeba majarã erã pepirire gahmeri daja? ¿Duhpirã iribojegue mua ñecũ sũmarã doreri mua iidiro dopa ta mũraro ta Cristo mariro dopa ta iidiani daja? ¿Eropirã duhpirã dohpaguere Moise dorerire mua iinũgarã, pohro majarã iro dopa árĩdiari daja mua?

¹⁰ Judio masa erã bosenuri iro dopa mua sã iica Goãmũ mera õadiarã. Soorĩnuri nũcũ, aberi nũcũ, bosenurire eropiica. Bojori nũcũ bosenurire õaro iica. Mua eropiiri queoro árĩbeaa.

¹¹ Mua eropiicũ pee ñero sĩporãcũca yũpũ. Muare yũ turaro buhequerẽcũ ta “Iri waja mari-boca,” arĩ pepia.

¹² Eropigũ yũhũ muare bũrigã õpa arĩ werea. Mari Jesucristore umupeoturadiro dopa ta umupeoque daja. Yũ Jesucristore umupeogu gũa

judio masa doreri yure taubiricũ ãha irire umu-peobiribũ pare. Eropirã mũa sã Jesucristore umupeorã iri dorerire umupeobiricãro gahmea Goãmũ mera õaro árĩmorã. Yũhũ mũa pohro ne árĩcũ mũa ne ñero iibiribũ yure.

¹³ Mũa masia yũhũ mũa pohro ne árĩdirore. Yũhũ Jesucristo marire tauburire ne mũare buhegu ejagu dorecũgu árĩbũ.

¹⁴ Yũ dorecũgu ñero taribũ. Yũ eropa dorecũgu árĩquerecũ mũa yure doobiribũ. Yure õaro umupeo õaro bocatĩribũ. Goãmũ obeodigu anyu árĩro dopa yure ãabũ. Yure Jesucristore iiro dopa õaro iibũ.

¹⁵ Yure burigã gamebũ. Yure burigã gamerã yũ serẽropẽ ta árĩpehrerire omorã árĩbũ yure. ¿Mũa eropa árĩcũ dohpa wahari dohpaguere? Mũa negohraguere yure mucubiridiro dopa ta dohpaguere mucubiribea.

¹⁶ ¿Mũare diaye majare yũ werera waja mũa ãaturigũ wahari dohpaguere?

¹⁷ Mũa pohrore gajĩ buherire buherã mũare õaro umupeocoma. Erã eropa umupeoquererã mũare sĩporã mera mahibiricoma. Mũa yure yũ buheri sãre gamebiricũ gahmema erã. Mũa erãpũre umupeocũ gahmema. Eropirã mũare umupeocoma.

¹⁸ Masare umupeocũ õapũrica. Erã weca dihta umupeocũ õabeaa. Yũ árĩcũ dihtare umupeocũ õabeaa. Árĩpehrerãre yujuropa ta õari mera umupeoniguicãro gahmea.

¹⁹ Mũa yũ porã iro dopa ãhraa. Eropigu mũare guñaricua. Mũare burigã guña te-

boricua. Yujugo porãcũbo teboricuro dopa ta yu sã teboricua mũare guñagu. Igo magu ãaro dehyoacũ gamego teboricũmo. Mũa Goãmũ porã ãaro árĩcũ gamegu teboricua yu sã. Mũa Jesucristo árĩricũrire ãaro opacũ gahmea.

²⁰ Mũa pohro bũrigã wadiarica. Yu mũa mera árĩgu yu basi mũare ãaro weremasiboya gojaripũ gojaro mariro. Eropigu mũare dohpagueere ãabigu mũa Jesucristore ãaro umupeoturanemoborore masibirica.

Agar Sara mera erã árĩrare werequeogu mari Goãmũ porã árĩrare werepũ Pablo

²¹ ¿Mũa Goãmũ mera ãaro árĩmorã Moise dorerire iiniguicãdiarã mũa Moise arĩ gojarare masibeari?

²² Ōpa arĩ gojañumi Moise: Abrahã porã ũaa perã árĩñuma. Īgu marapo pohro majago Agar waĩcũgo yujugu porãcũñumo. Pũhrũ Abrahã marapopũ Sara waĩcũgo gajigu porãcũñumo.

²³ Īgu pohro majago magu mari masa iro dopa ta masa dehyoañumi ĩgu. Abrahã igore porã moara pũhrũ mata nijipo ãhri porãcũñumo. Īgu marapopũ mata porã bocamasibiriñumo. Eropigu Goãmũ ĩgu arĩdiro dopa ta igore porã bocacũ iĩñumi.

²⁴⁻²⁵ Erã perã nome iribojegue eropa warare õpa buhegura mũare. Goãmũ Abrahãre wererare iirã Sara árĩro dopa ãhrima. Gajirã Moise dorerire iirã Agar iiro dopa ãhrima. Agar igo porã sã gajirã dorero doca árĩmũriñuma. Pohro majarã árĩmũriñuma. Erã arĩdiro dopa ãhrima Moise dorerire iirãpũ. Eropirã Moise doreri

doca árĩmũrirã ährima pohro majarã iro dopa árĩrã. Iri dorerire iirã “Goãmũ mera õaro árĩrãca,” arĩmũririma. Iri dorerire Goãmũ Moiserẽ apĩñumi Sinaí waĩcũdigũ utãgũgue Arabia yebague. Dohpaguere iri dorerire Jerusalẽgue judio masa umupeoma. Eropirã iri doreri doca ährima.

²⁶ Õpa ährima Goãmũ Abrahãre wererare iirãpũ. Erã Jesucristore umupeorã ährima. Sara árĩdiro dopa ährima. Sarapũ pohro majago árĩbirimũriñumo. Mari Jesucristore umupeorã “Moise doreri mera taribea,” arãa. Jesucristo marire taucũ Goãmũ porã árĩrã mama Jerusalén maca majarã ähraa.

²⁷ Eropirã Jesucristore umupeorã Goãmũ porãpũ bajarã árĩrãcoma. Moise dorerire iirãpũ bajamerã árĩrãcoma. Eropã ta arĩ werea Goãmũ yare gojarapũgue:

Mãhũ ne porã opabigo, porãcũri pũririñe pepibigo õaro mucubirique. Gajigo igo marapũ mera árĩgo igo porã árĩquerecũ igo pãramerã árĩturiarã bajamerã árĩrãcoma. Mũpũre dohparagã mũ porã mariquerecũ mũ pãramerã árĩturiarã tauro bajarã árĩrãcoma. Eropigo mucubirique, arĩñumi Goãmũ.

²⁸ Isaa Abrahã magũ árĩdiro dopa mari Goãmũ porã ähraa. Isaa Abrahã magũ dehyoagũ Goãmũ ãgũ werediro dopa ta dehyoañumi. Mari Goãmũ porã árĩrã Goãmũ ãgũ werediro dopa ta ãgũ porã ähraa.

²⁹ Eropirã Abrahã porã perã arĩñuma. Pohro majago magũ Ismael árĩpehrerã masa iro

dopa dehyoañumi. Isaapɸ ɨɸ pago igo porã bocamasibiricũ Espíritu Santo itamuri mera porãcũño. Erã dehyoara pɸhrɸ Ismaepɸ pohro majago magɸɸ Isaare Abrahã marapo magure ɨɸ ñero taricũ iimuriñumi. ɨɸ iidiro dopa dohpaguere eropa wahaa. Erã Moise dorere iidorerãpɸ marire ñero taricũ iima. Mari Espíritu Santo itamuri mera Goãmɸ porã ãhraa. Mari eropa árĩrãre marire ñero taricũ iima.

³⁰ Eropã wacũ Goãmɸ yare gojarapũgue irire dohpa arĩre buherãca. Õpa Goãmɸ arĩñumi Abrahãre. “Mɸ pohro majago magɸ mɸ oparire ne opasome, arĩñumi. Mɸ marapo magɸ dihta opapehogucumi. Eropigɸ mɸ pohro majago igo magɸ mera cóãque mɸ pohrore,” arĩ wereñumi Goãmɸ Abrahãre.

³¹ Eropirã, yɸ acawererã, mari Goãmɸ porã árĩrã pohro majago magɸ iro dopa árĩbeaa. ɨɸ pagɸ oburire opamasibiriñumi. Maripɸ mari Pagɸ Goãmɸ ɨɸ oburire opamasirãca. Marire ɨɸ mera õacũ iimi.

5

Cristo marire ɨɸ taura pɸhrɸ turarã árĩro gahmea marire, arĩ gojapɸ Pablo

¹ Eropigɸ marire mari ñecu sũmarã árĩricuri dorero doca árĩnirãre Jesucristo tautuhajami. Mari ñero iira dipuwajare Jesucristo ɨɸ basi wajayebasami mari Goãmɸ mera õaro árĩboro

dopa. Eropirã mari Goãmũ porã árĩrã Jesucristore guñaturaniguicãro gahmea. Eropirã pee-biricãro gahmea erã Moise dorerire iidorerãre.

² Ōaro peeque yũre. Yũhũ Jesucristo ĩgu apidigu āhraa. Eropigu mũare õpa werea. Mũa Goãmũ mera õaro árĩmorã mũa gasiro merogã wiri aĩcũ Jesucristo mũare ĩgu sĩribasara waja mariboya.

³ Eropigu guhyadiaro mera werea daja. Goãmũ mera õaro árĩborore erã gasiro merogã wiri aĩrã Moise dorerire árĩpehrerire iiro gahmea erãre.

⁴ Eropirã mũa “Goãmũ marire taugucumi Moise dorerire iicũ,” mũa arĩdiarã, mũa Jesucristore cóarã iiboca. Mũa eropiirã Goãmũ ĩgu mera õaro árĩburire mũare õaro ĩgu iiburire cóarã iiboca.

⁵ “Maripũ Goãmũ mera õhaa,” arĩmasia Jesucristore umupeori mera, Espĩritu Santo ĩgu itamuri mera. “Goãmũ guare ‘Ñero iira dipuwaja mariro õarã āhrima,’ arĩ ĩagucumi,” arĩmasia.

⁶ Eropiro gasiro merogã wiri aĩnirã árĩcũ sãre, wiri aĩbirinirã árĩcũ sãre ĩabeami. Mari Jesucristore umupeorã árĩcũ gajirãre mari mahi umupeocũ ĩhami Goãmũ.

⁷ Mũa ne Jesucristore umupeorã ĩgu yare õaro diaye iimũribũ. Eropirã dohpaguere mũa Jesucristo yare diaye majare õaro iibiricũ gajirã mũare cãhmotañorã.

⁸ Goãmũpũ eropa iibirimi. ĩgu mũare Jesucristo yarã árĩmorãre beyegu āhrimi.

⁹ Eropigu õpa werea mũare. Yujugu masũ ĩgu guyarire buhenugacũ peerã masa árĩpehrerã

ĩgũre peerã gũyarire umupeorã wahama ãaripũre peediabirã.

10 Ĩgũ mũare eropa gũyarire buhenũgaquerecũ õpa arĩ pepia. “Erã Jesucristore umupeorire oparã erã iri gũya buherire umupeosome,” arĩ pepia yũhũ mũare. Mũare goroweocoregũre noho árĩgũre ĩgũ eropa iira dipuwajare Goãmũ dipuwaja moagũcumi ĩgũre.

11 Õpa arĩ werewũañorã gajirã yũpũre: “ ‘Mari Goãmũ mera ãaro árĩmorã mari gasiro merogã wiri aĩro gahmea,’ arĩ buhemi Pablo,” arãñorã yũre. Yũhũ eropa arĩ ne buhebeaa. Yũhũ dohpaguere “Gasirogã wiri aĩro gahmea,” yũ arĩ buhecũ irire iidorerãpũ yũre ñero taricũ iibiriboañuma. Yũ õpa arĩ buhea: “Mari ñero iira dipuwajare Jesucristo wajayebasadi árĩmi crusague sĩrigũ. Eropirã mari Goãmũ mera ãaro árĩmorã Jesucristore umupeoro gahmea,” arĩ buhea yũhũ. Yũ eropa arĩ buhecũ judio masa pee guama. Yũre ñero taricũ iima.

12 Erãpũ mũare gorweorãpũ gasiro merogã wiri aĩdorerãpũ erã basi wiri aĩpehocãporo.

13 Mũarũre Goãmũ mũa ĩgũ porã árĩmorãre aĩgũ mũa Moise dorerire iimorãre beyebiripũ. Mũare iri dorerire iidorebiriquerecũ mũa mũa uaribejarire iibiricãro gahmea. Õpa iiro gahmea. Mũa árĩpehrerãre ãaro mahi umupeorã erãre itamuniguicãro gahmea. Mũa gajirãre umupeorã Moise dorerire árĩpehrerire iirãca.

14 Eropa ta arĩ gojara ãhraa: “Mũ basi mahiro dopa ta mũ pohro árĩrãre mahique,” arĩ gojara

ãhraa.

¹⁵ Eropirã mua game ïhaturicũ, papũri, mua disitĩri wereniguicũ mua basi õaro mua game umupeoro pehreboca. Eropirã mua basi õaro árĩro gahmea.

Masa erã gamerire iirire Espĩritu Santo ïgu gameri sãre werepũ Pablo

¹⁶⁻¹⁷ Õpa arĩ werediaca muaare. Mari Jesucristo yarã árĩcũ mari pepirigue õpa ãhraa. Mari ñeri uaribejari ãhraa. Espĩritu Santo ïgu gameri sã ãhraa. Mari uaribejari Espĩritu Santo ïgu gameri mera yujuro mera árĩbeaa. Eropiro marire masiya mariro wahaa. Eropirã mua Espĩritu Santopũre yũhrirã mua uaribejaripũre iisome. Eropirã Espĩritu Santo ïgu gamerire iiniguicãque.

¹⁸ Eropirã Espĩritu Santo gamerire iirã árĩrã “Moise doreri mera mari tarirãca,” arĩ pepibeaa mua.

¹⁹ Masa erã ñeri uaribejarire erã iicũ õaro ïhamasica mari. Õpa iima erã uaribejarire iirã: Ũma gajirã nome mera ñero iima. Nome sã gajirã uama mera ñero iima. Diayea iiro dopa iiricũma. Ñerire pepima. Ñerire wereniguima.

²⁰ Eropirã goãmarã wéanirãre umupeorã “Mari goãmũ ãhrimi,” arĩ umupeoma. Gajirãre dojama. Eropirã masare doho ãhrima. ïhaturima. Disitĩri wereniguima. Gajirãre doéma. Mata guama. Gajirãre tarinũgadiama. Yujuro mera árĩdiabeama. Yuju curu majarã gajĩ curu majarãre ïhaturima.

21 Eropirã gajirãre gajinore erã opacũ ìhaturima. Gajirãre wejẽdiarã wejẽma. Merericurã àhrima. Mererã ñerire ùaribejama. Eropa iirã gajino ñeri sãre iima. Eropigũ yũhũ mũare werediro dopa ta werea daja guhyadiaro mera. Iri ñerire iiniguigu Goãmũ ìgũ opu áríroguere ejamasisome.

22 Espíritu Santo yapũ òpa àhraa. Erãre òpa iirã árĩcũ iimi. Árípehrerãre mahi umupeoma. Mucubirima. Güiro mariro àhrima. Gajirã erãre ñero iiquerecũ erã mera guabeama. Mojomoro ìhama. Duhuro mariro Goãmũ ìgũ gamerire òaro iima. Erã mohmediarire erã mohmedia-biriri sãre òaro iima.

23 Eropirã nijiyajaro mera iima. Erã ñero iidia-quererã iibeama. Eropa ta iima Espíritu Santore yũhrirã. Eropa iirãre “Eropa iibiricãque,” ne arĩbeami gajigũ.

24 Eropirã mari Jesucristo yarã árĩrã mari ñero árĩdirore duhucã mari gamerire mari ùaribejarire iiniguicãbeaa.

25 Eropirã mari Espíritu Santo itamuri mera iirã árĩrã ìgũre yũhriniguicãro gahmea.

26 Eropirã mari “Yũhũ gajirãre tarinũgaa,” arĩ pepibiricãrã. Eropirã gajirãre game ìhaturicũ iibiricãrã. Gajirã erã òari oparire obobiricãrã.

6

Mũa mera majarãre itamuque, arĩ wererũ Pablo

¹ Acawererã, mũa mera majagũ Jesu yagũ ìgũ ñerire iicũ ìha ìgũre itamuro gahmea mũa

Espíritu Santo dorerire iirāpūre. Īgu iri ñerire duhucũ ðaro mera werero gahmea. Eropa itamurā m̄ua ðaro pee masique m̄ua sã ñerire iiri arĩrã.

² Eropirã m̄ua basi game itamuque árĩpehrero. M̄ua eropa itamurã Jesucristo doreldiro dopa ta iirãca.

³ Yujugu “Yupũ ðarire iigu āhraa,” arĩ pepigu, ĩgu ðarire iibiriqeregu ðpa arĩgu ĩgu basi guyagu iimi.

⁴ Eropirã marire ðpa iiro gahmea. Mari basi mari iiricũre ðaro queoñanurũsiaro gahmea. Eropa ĩara pũhrũ mari árĩricũri ðari árĩcũ ĩha “Yũhũ ðarire iiaa,” arĩmasia. Eropirã mari ðari árĩricũri mera mucubirimasia gajirã árĩricũre ĩaro mariro.

⁵ Eropigu mari árĩricũre Goãmũ beyegũcumĩ. Eropirã mari gajirã erã iiricũre ĩhanurũbircãro gahmea. Eropirã mari yujurãyeri iiripũre ĩaro gahmea.

⁶ Eropirã Jesucristo yare ðari buherire peerãpũ erãre buherãpũre erã gamerire itamuporo árĩpehrerire ðarire.

⁷ Eropirã “Goãmũ yũ ñerire iira dipuwaja dipuwaja moasome yũre,” arĩ pepi masiya mara. Ōpa arĩ pepirã m̄ua diaye arĩ pepibirica. Eropiro Goãmũre gũya masiya mara. Eropirã mari dohpaguere iira waja pũhrũgue bocarãca.

⁸ Eropirã mari ñaribejarire iiniguirã iri ñeri iira waja dipuwajacũrãca. Eropirã peamegue warãca. Mari Espiritu Santo gameripũre iirã ðaro wajatarãca. Eropirã Goãmũ mera ñmũri nũcũ ðaro árĩniguirãca.

⁹ Eropirã mari Espíritu Santo gamerire iiniguicãrã. Gariborebircãrã. Goãmã gamerinã mari wajatarãca ôarire duhubirã. Eropirã ôarire iiniguicãro gahmea.

¹⁰ Eropirã árĩpehrerisubure ôaro umupeoro gahmea árĩpehrerãre. Eropirã Jesucristore umupeorãre buringã mahi umupeoro gahmea yujugã porã iro dopa.

Pablo ãgu weretura

¹¹ Ìata. Yũ basi mũare gojagũ pagari deyori mera gojagũ iiaa.

¹² Eropigũ ôpa werea mũare. Erã mũare gasiro merogã wiri aĩdorerãpũ ôpa gahmema. Erã dorerire mũa iicũ ãha gajirã judio masa erã mera ôaro árĩbocoma. Eropirã erãre ñero taricũ iibiribocoma daja erã Jesucristo yare umupeoquerecũ.

¹³ Erã basi gasiro merogã wiri aĩquererã Moise dorerire gajire iibeama. Erã eropa iibiriquererã, mũapũre erã dorerire iidorerã mũa gasiro merogã wiri aĩcũ gahmema erã. Eropa gahmema gajirã judio masare ôpa erã arĩboro dopa mucubiriri mera. “Gũa dorero mera Galacia majarã judio masa árĩbirã mari árĩricũre iiaa,” erã arĩboro dopa mũare erã dorerire iicũ gahmema.

¹⁴ Yũ tamera erã eropa mucubiridiaro dopa ta ne mucubirisome. Mari Opũ Jesucristo iira mera dihta mucubiria. Ìgu mari ñero iira dipujare wajayebasadigu árĩmi crusague siringũ. Iri dihtare mucubiria. Jesucristo eropa iira mera yũhũ ãgu taudigu árĩgu masa erã ãaribejarire

guñabeaa pare. I umu maja masa erã uaribejari sã doremasibea yare.

¹⁵ Eropiro gasiro merogã wiri aĩcũ, wiri aĩbircũ sãre Goãmu ãabeami. Masa Jesucristo mera õari mera gohrotorã árĩcũ ãhami.

¹⁶ Erã eropa gohrotonirã árĩpehrerã iri buherire Jesucristo yare yãhrirãre “Erã õaro árĩporo,” arĩ serẽa Goãmure. “Erãre mu ya curu majarã gohra árĩrãre mojomoro ãaque,” arĩ serẽbasaa yũhu Goãmure.

¹⁷ Yũhu Jesucristo doreldiro dopa ta iigu ãgu yare buhera dipuwaja gajirã yure ñero taricũ iima. Erã eropa iira camĩ mura ãhraa yure yu dũpũre. Eropigu õpa gahmea: Iripẽta yure bujawerecũ iiporo Jesucristo yarãre goroweorã.

¹⁸ Mũare árĩpehrerãre õaro árĩcũ gahmea. Mari Opũ Jesucristo mũare árĩpehrerãre õaro iiporo. Eropa ta iiporo. Iripẽta ãhraa.

Desano

Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

17771afc-c309-57fd-9ff3-2d5a0cd59ff1